

ben/ vnd nennen ihn ein Erfinder aller verborgener Künsten. Ich aber für mein Person/ will diser letzten meinung gern zustimmen/ dieweil es gewiß ist/ daß er der fürnembst Philosophus gewesen/ wie auß seinen Schrifften zu mercken ist/ dann er hat die vrsachen der natürlichen Dingen auff das fleissigste erforschet/ nach derselben erkantnuß hat er zugleich die Materij/ welcher sich die Natur gebraucht/ in den Mineren der Erden zu generieren/ die Metallen anzeigt/ daß so vil diser meinung gefolgt sind/ alle zu wahrer Erkantnuß kommen/ als Pythagoras, Plato, Socrates, Zeno, Hali, Senior, Rasis, Geber, Morienes, Arnold. de villa Noua, Raimūsdus Lulius, vnd viel andere die alle zuerzehlen lang were/ auß welchen wir diß vnser Büchlin nit ohn grosse arbeit zusammē gelesen/ wie ihre Bücher das Zeugnuß geben/ dann sie dermassen geschriben/ vnd auff dise weiß (ja wo sie die Forcht Gottes nit vor den Augen gehabt hetten) daß vnmüglich ist/ allein durch lesen der Bücher darzu zukommen/ wie Geber in sua Summa: Du Sohn der Weißheit/ du solt hierinn nit verzagen/ dann du durch vielfältige betrachtung leßlichen dahin kommen wirst/ wohin dein Gemüth begert/ wer aber allein vermeint/ allein vermittelst der Bücher darzu zukommen/ fehlet weit/ dann die Philosophi dermassen geschriben/ daß sie es allein verstünden/ vnd der wahre Practicus zugleich die weiß der erforschung zugemischt/ vnd die fürnembsten Werck/ in viel vnderschiedliche Capitel außgetheilt/ welches sie derwegen gethan/ dz nit zugleich jeder verstünde/ dise Göttliche wissenschafft in einem tag/ ja in einer stund/ derhalbē weil sie edel/ ist sie verborgē.

Alphidius spricht: Es ist zuglauben/ daß vnser Vorfahren/ die Philosophi ihr fürnembste Meinung vnd verborgene Reden/ in vielen Figuren vñ Kährtschen mitgetheilt/ damit nit die ganze Welt durch dessen erkantnuß zu grund gienge/ daß es wurde niemand wöllen arbeiten/ wenn er mit solcher Reichthumb sich vberschütt befinden wurde/ darmit entschuldiget sich auch Hermes/ da er im anfang seines Büchlins sagt: Ihr solt nit dencken/ daß die Weisen/ solches auß neid gethan/ gegen den frommen vnd gutherzigen/ sonder allein vmb der Gottlosen willen/ dann es sagt Rosinus, diß fahls wurde der Narz dem Weisen gleich seyn/ vnd der

A

Gottloß